

Ny Valosoa sy hadihady

Filoha Rajoelina

Tsy manana tetikady amafana ireo fahafaham-baraka nifanesy

Tsy mitsahatra misafotofoto ny toe-draharaham-pirenena tato anatin'ny 3 taona, ka tsy fantatra intsony na misy mody adala na vao miana-draharaha, na tsy nanampo ho tonga eo amin'ny fitondrana ny manam-pahefana eto amin'ny Firenena. Eo amin'ny sehatry ny toekarena dia miiba : -7,2 ny taha-ny harinkarena faobe (taux de croissance économique). Mitotongana ny sandam-bola ariary ka efa mananika ny dimy arivo ariary ny euro iray. Mahantra fadiranovana ny sivifolo isan-jato maherin'ny Malagasy.

Misavorovoro ny sehatra politika, ka sakanana tsy mahazo mihetsika ny mpanohitra kanefa zo fototra voarakitra ao amin'ny Lalàmpanorenana. Tsy ny mpanohitra ihany fa hatramin'ny fiarahamonim-pirenena toy ny Mpiaro ny Zon'ny Mpanjifa. Porofon'izany ny hetsika nataon'ity farany ny zoma lasa teo, ka tsy navela niditra teo amin'ny Kianjan'ny 13 Mey. Ny alahady lasa teo koa dia nosakanana tsy niditra tao amin'ny Magro Toliara ny vahoaka. Ny hetsika saika natao anefa dia ny fanamarihana ny tsingerin-taonan'ny Filoha Ravalomanana Marc. Nialohan'io dia efa nosakanana teny an-dàlana ho any Akililaoka izy ny alakamisy. Ny mahavariana dia toy ireny sonégaly mahazo baiko tamin'ny fanjanahantany ireny ny mpitandro filaminana amin'izao fotoana izao. Tena tsy mahafantatra ireo zon'ny Filoha Ravalomanana Marc amin'ny maha olom-pirenena mizaka ny zo feno maha Malagasy azy, ankoatry ny zo maha filoham-pirenena teo aloha azy ve ireto toa sonégaly herimpamoretana ireto?

Bahanan'ny IRD daholo ny andrim-panjakana rehetra, ny mpanatanteraka no mibaiko ny sehatra rehetra, ka zary mpanjaka manjaka tokana ny filohan'ny Repoblika, satria tsy misy hetsika mandeha raha tsy misy baiko avy any aminy. Tsy te-hahalala ny mpomba an-dRajoelina Andry ka hatramin'ny Lalàna fototra momba ny tetibolam-panjakana avy no lanilany foana satria tsy nisy nahavaky sy nandinihana tamin'ny antsipiriany izany akory ireo maro an'isa ao amin'ny Antenimierampirenena. Ny tena zava-doza dia ny fanovaovana ny anaran'ny tetikasa nindramam-bola any ivelany toy ny "téléphérique" lasa "transport sur câble". Midika izany fa na ireo depiote aza dia tsy mahay mamaky na tsy mahay ny elanelan'ireo voambolana ireo. Tsy mahafantatra ihany koa ny depiote, fa tsy ny eto an-drenivohitra ihany no mibaby izany trosa izany, fa hatramin'ireo vahoaka nifidy azy ireo, izay tsy hampiasa na hitaingina izany

na oviana na oviana. Araka izany dia samy tsy misy mihevitra izay mety mahasoa ny vahoaka any amin'ny distrika niaviany ny ao amin'ny fitondrana ao, fa mikatsaka izay tombontsoany manokana, ka kat-sahina avokoa izay fomba rehetra hanaovana bizina.

Tsy takona hafenina intsony ny olana mianjady amin'ny vahoaka Malagasy izay mahantra ny sivifolo isanjato mahery. Malaza amin'izao fotoana izao ny "bidon jaune" izay mitandahatra ampolony metatra maro eny amin'ny paompim-pokontany. Ny manana rano an-trano dia tapaka matetika ny rano, ka misy ora maro na andro maro mihitsy ny fay rano amin'ny tanàna, ka tsy misy ho velesina intsony. Tsy amba-kan'izany ny fahatapahan-jiro, tsy eto an-drenivohitra fotsiny fa hatrany amin'ny Faritra any koa. Mirongatra indray ny valanaretina covid-19 ka manahy ny maro fa sao hamerina ny hamehana ara-pahasalamana indray ny mpitondra, mba hahafahany manao izay tiany hatao indray, satria efa manomboka mihetsika daholo, tsy ny mpanohitra ihany fa hatramin'ny fiarahamonim-pirenena ihany koa. Soa ihany, angamba, fa mbola variana manomana ny fety faran'ny taona ny ankamaroan'ny olompirenena. Tsy misitraka ilay tsy fandoavana haban-tseranana intsony ireo orinasa afaka haba, ka azo antoka fa hikatonina indray izy ireny dia ho maro indray, ny ho voaraoka amin'ny asany hanampy ireo efa lasa mpivarotra amoron-dàlana sy mpanakan-dàlana. Maro koa ny ray aman-dreny no tsy afaka mandefa ny zanany any an-tsekoly intsony satria tsy manam-bola andoavana saram-pianarana ary foana tanteraka ilay saranga antenantenany (classe sociale moyenne), mitombo isa izay tsy izy ny mpatory an-tsena sy eny ambany tetezana ary eny amin'ny manodidina ny fanariam-pako. Nizara tany iray hekitara, trano, omby vavy be ronono indray ny filohan'ny Repoblika toy ny nataony tany Antsoatany. Tsy fantatra akory anefa ny tohin'ity tantara farany ity. Tsy mbola hitan'ny mpitondra ihany koa izay vahoakana manoloana ny tsy fandriampahalemana, ka ny vahoaka na mpianatra manao fihetsiketsehana, tàmam-polo, hanohanana izao fahoriana tsy roa aman-tany izao no ampiasàna fitaovam-piadiana ary tsy mahovoko firy manoloana ny asan-jiolahy sy fanafihan-dahalo. Sambon-danitra sovietika no nomena anarana "Apollo", ka avy eny an-danitra raha izany no niainga ny fiketrehana ny fifofoana ny ain'ny filohan'ny Repoblika. Efa mandeha moa ny fitsarana ka ho hita eo izay ho tohiny.


Andry Tsiavalona

CFM

Hanatanteraka fivoriana momba ny fampihavanana hono

Manambara izao ny ao amin'ny CFM, na ny Komitin'ny Fampihavanana Malagasy, fa hanatanteraka fivoriana momba ny fampihavanana hono izy ireo ato ho ato, amin'ny faritra maro samihafa misy eto amin'ny Ntao. Noho izay fandaharam-potoana heverin'izy ireo hatao izay, manao antso avo amin'ireo ankolafin-kery rehetra mba hanotrona ny fivoriana ny CFM, hoy ny fanambarana. Mialoha ny fifidianana filoham-pirenena ny taona 2023, dia nanazava ny filohan'ny kaomitin'ny Fampihavanana Malagasy Maka Alphonse, fa hisy ny fivoriana hampivondronana ireo antoko politika sy ankolafin-kery rehetra mba hihavana. Tanjona, ny mba hisorohana ny korontana hataon'ireo mpanararaotra. Ny mba hisian'ny fitoniana eto amin'ny tany sy ny firenena. Manoloana ny korontana etsy sy eroa, ny fifanaratsiana noho ny tsy fitovian-kevitra politika dia manao antso avo ny tenany, mba hananan'ny rehetra fitoniana. Noho izany, asaina ireo ankolafin-kery rehetra, ny antoko politika ary ireo fikambanana ho tonga hamonjy ny fivoriana izay hatao. Mbola tsy fantatra kosa anefa hatreto ny fotoana hanatanterahana izany. Hatreto, rafitra iray mihinam-bolam-panjakana fotsiny ity CFM ity, tsy hita izay fampihavanana vitany momba ny raharaha resaka olana tany maro eto amintsika amin'izao fotoana. Ny CENI vaovao dia rafitra hiteraka korontana eto amin'ny firenena, satria rafitra efa hita fa hitanila dieny ety am-piandohana, tsy ahitana teny momba izany anefa hatreto ity rafitra misahana ny fampihavanana ity. Ny raharaha fampiasan-kery nataon'ny mpitandro filaminana farany teo tany Toliara, olona hankalazana tsingerin-taona nahaterahana miaraka amin'ny vahoaka ve dia darohana lakrimôzena, tsy ahitan-teny momba izany anefa i Maka Alphonse sy ny forongony, koa inona no fampihavanana antenaina amin'izy ireo amin'izany ?

Stefa



Ny filohan'ny CFM Maka Alphonse, rafitra mihinam-bolam-panjakana fotsiny ny rafitra izay tarihany.

RAHARAH A POLLO 21

Voasazy 20 taona asa an-terivozona Paul Rafanoharana...

Nivoaka omaly ny didimpitsarana mahakasika ilay raharaha Appolo 21, na ilay raharaha voalaza fa nisy fikasana hifofo ny ain'ny filoha Andry Rajoelina. Naharitra andro maromaro ny fanadihadiana natao an'ireo voampanga, sy ireo vavolombelona momba ity raharaha ity iray vita sy navoaka tamin'ny fiakaran'ny taom-pitsarana 2021 eto amintsika omaly ny didy. Ny didimpitsarana tamin'izany: -

20 taona asa an-terivozona: Paul Rafanoharana.
- 10 taona asa an-terivozona: Razafindrakoto Aina Marie sy François Marc Philippe.
- 5 taona asa an-terivozona: Andrianandrianina Voahangiarisoa Nomenjanahary.
- Afaka noho ny fisalasalana: Rozette Brigitte sy ny jeneraly Razakarimanana Ferdinand.
- 5 taona an-tranomazina sazy mihantona : Ra-

mahatra Victor sy Andrian-zanakolona William Yvon, na i Sareraka.
- Afaka madiodio: Rakotondramanana Alain José,
Diary Rivoahasina Angelot Gaston,
Dabaka Jean Michel, Valomila Bien Aimé,
Harisoa Princy,
Totoarisoa Rakotoarison Alphonse Anthony,
Andria Tiana Michel,
Ravelonarivo Jocelyn,
Rakotoarimanana No-

menjanahary Maminiaina Patrice,
Rapo Nicholson Edouard, Diambelou Euclide.
Samy nanana ny fandraisany azy ny sokajin'olona samihafa momba ity raharaha ity, ao ny nilaza fa sinema, ao ireo nilaza fa zavatra tena nisy ilay fikasana hamono ny filoha. Ny hita aloha, vita omaly iny fitsaran'olombelona iny! Ho hita eo ihany ny ho tohiny!

Stefa



Paul Rafanoharana sy François Marc Philippe, anisan'ireo vaoheloka hanao asa an-terivozona.



TONONKALO

Ho an`iza irery ireo fepetra ?

Mora ery ho anao mpitondra ny mamoka ireo fepetra, izay voalaza fa tsy maintsy hoe ankatoavin'ny rehetra, Saingy raha ny zava-misy dia ianao hatrany hatrany, No manivaka sy tena tsy manaraka an'izany.

Ianao no mbola sahy mamory sy miantso ireo vahoaka, Mba hihaino rediredy sy kabary mampanoaka ! Nefa ianao no ilay mandrara sady sahy mampiasa hery. (Fa ny didy sy lalàna, moa natao ho an`iza irery ?)

Mba jereo aloha ny tena vao miteny sy mandahatra, F'efa tena mankaleo ireo revin-gadra tsy mitsahatra. Mba jereo ny mahasoa ireo vahoaka mitaraina, F'aza dia ny mahafinaritra, izay no hany tanisaina .

Tsy ny zavatra mirenty nefa tena tsisy vidiny, No hanala ireo vahoaka eo amin'ny toerana mangidiny, Fa ny zava-mahasoa no `ndeha ataovy lohalisitra, Mba tsy ho rampony ny gasy na ho zatra miady gisitra !

IRINA HO TAFITA (16-12-21)